

Newspaper	BERITA HARIAN
Date	10/01/2018

Pencalonan Tun M langkah ke belakang

RH-10/1/2018 pg-5

Kuala Lumpur: Pencalonan Tun Dr Mahathir sebagai Perdana Menteri sekiranya parti pembangkang memenangi Pilihan Raya Umum Ke-14 (PRU-14) disifatkan sebagai langkah ke belakang pakatan itu.

Presiden GERAKAN, Datuk Seri Mah Siew Keong, berkata ketika rakyat inginkan pemimpin dalam kalangan generasi muda, pakatan pembangkang itu memilih calon perdana menteri yang kini mencapai usia 93 tahun.

“Sebenarnya saya tidak yakin Dr Mahathir akan diangkat sebagai Perdana Menteri walaupun pakatan

pembangkang memenangi PRU-14. Ini hanya helah pembangkang untuk mengaburi mata rakyat.

Ideologi tidak sama

“Lagipun ideologi mereka tidak sama. Mereka hanya bersama semata-mata untuk politik dan ia adalah tidak sihat untuk politik negara,” katanya ketika diminta mengulas pencalonan Dr Mahathir yang juga Presiden Parti Pribumi Bersatu Malaysia (PPBM) sebagai calon Perdana Menteri.

Presiden Parti Keadilan Rakyat (PKR), Datuk Seri Dr Wan Azizah Wan Ismail, pula dicalonkan Tim-



Mah Siew Keong

balan Perdana Menteri.

Pencalonan bekas Perdana Menteri paling lama dan Dr Wan Azizah itu diumumkan pada konvensyen Pakatan Harapan yang dihadiri pemimpin dan penyokong PKR, PPBM, DAP serta Parti Amanah Negara (PAN).

Terdahulu, Siew Keong yang juga Menteri Perusahaan Perladangan dan Komoditi menyampaikan ucapan pada sesi Dialog dan Seminar Reach & Remind, Friends of Industry yang dianjurkan oleh Majlis Minyak Sawit Malaysia (MPOC).

Yang turut hadir, Ketua Setiausaha Kementerian Perusahaan

Perladangan dan Komoditi, Datuk K Yogeesvaran; Pengerusi Lembaga Minyak Sawit Malaysia (MPOB), Datuk Seri Ahmad Hamzah; dan Pengerusi MPOC, Datuk Lee Yeow Chor.

Mah berkata, walaupun gerakan yang dibawa oleh pakatan pembangkang itu untuk menghadapi PRU-14 dilihat lebih besar, namun beliau yakin rakyat akan terus memberi mandat yang lebih besar kepada Barisan Nasional (BN).

“Sentimen rakyat dan pengundi Cina terhadap BN saya berasakan lebih baik berbanding PRU yang lalu,” katanya.